

**Protocol no. 89****Sezzüda da marcurdi, als 29 schner 2014 2014****09.00 - 12.00**

**Preschaints:** Albert Mayer, Andri Poo, Men Caviezel, Dumeng Jann, e Marco Fallet (protocol)

**S-chüsada:** Marianne Werro-Lehmann caus'absenza our d'cumün.

**Protocol**

Il protocol no. 88 da la sezzüda da lündeschdi, als, 20 schner 2014 vain approvà.

**793 720.501 Chasinas d'immundizchas  
Duonna Rita Jenny / molocs a Davo Stron**

Il capo spordsch'a duonna Rita ed a sar Reto Jenny il bivgnaint tils ingrazchond pella cumparsa.

**Molocs piazzats sùlla parcella da la fam. Jenny a Davo Stron**

Davart dal cumün d'eiran a seis temp gnüts piazzats be sper la chasa da parcar Davo Stron divers molocs pel s-chart. Il proceder da fabrica cun publicaziun e.u.i. d'eira gnü effetuà, però i d'eira gnü interlaschè in quella da suottametter la dumonda a la fam. Jenny chi'd ais possessura da quella parcella. Medemmamaing posseda quella la parcella sùlla quala ais gnüda construida la chasa da parcar – dimena in üna relaziun da dret da fabrica cul cumün.

I sto uossa gnir chattada üna soluziun chi regla la relaziun culs molocs e chi po cuntantar ad amenduos parts. Las trattativas ston gnir manadas culs uffants, causa cha quels han surtut i'l fratemp l'immobiglia dals genituors.

Our da la discussiun resultan divers puncts chi pudessan gnir trats in consideraziun per reglar la relaziun tanter fam. Jenny e cumün. Quels vegnan uossa examinats davart dal cussagl ed a temp ütil suottametterà quel üna proposta a la fam. Jenny.

**794 021 FABRICA  
Società d'alp e chascharia Sent / implant da mundscher illa  
stalla existenta da l'alp Prà San Flurin**

La documaint'ais avantman in möd cumplet. La cumischiun ha trattà la fatschenda e sün proposta da quella decid'il cussagl d'inoltrar la dumonda in sen positiv a l'uffizi chantunal pel proceder dal BAB.

**795 021 FABRICA  
Fam. Flurin Nuotclà / müdamaint d'adöver intern da la chasa  
d'abitar existenta**

La cumischiun da fabrica ha examinà la dumonda per ün müdamaint d'adöver illa chas'a Saglina. In üna part da las localitats dal plan terrain, fin uossa gnüd'utilisada sco local da zambriar, es previs da construir landroura ün'abitaziun plü pitschna. Seguond sclerimaints cul uffizi chantunal, sto causa müdamaint d'adöver e tenor prescripziuns da la ledscha da

seguondas abitaziuns, gnir inscritta l'abitaziun nouva i'l cudesch fundiari sco prüm'abitaziun obain sco abitaziun qualifichada administrada turisticamaing. Il cussagl decida da conceder quel permiss suot las cundiziuns surmanzunadas.

**796 860.503.04 Trafo Chavorgia**  
**Lö alternativ per üna staziun da trafo**

Andri Poo preschainta la fatschenda. L'uffizi da fabrica vaiva surdat a l'uffizi chantunal per la planisaziun dal territori da sclerir diversas dumondas e puncts in fatschenda. Quella posiziun ais uossa avantman. La dumonda centrala ais, schi'd ais pussibel da müdar la zona resp. d'attar be il plan d'avertüra illa tratta da la revisiun totala da la planisaziun cumünala. A quella dumonda respuonda l'uffizi cun ün cler na. Quai significha cha la varianta da Palü da Sala chaschuness ün cler cas da pregüdizi. Blerant muossa l'uffizi via sün üna pruna puncts problematics cha'l lö alternativ previs dals iniziants da Chavorgia chaschuna. Quel as rechatt'illa zona per la protecziun da la cuntrada. Pro üna dumonda da fabrica in quella zona as stu vess tanter oter eir quintar cun opposiziun da diversas instituziuns per l'ambient. Resümond la posiziun da l'uffizi stu vess gnir fat ün lung e stantus proceder per raggiundscher üna müdaziun da la zona cul plan d'avertüra, pro'l qual stu vessan gnir consultats divers uffizis dal Chantun.

In bas'a quella posiziun ed al proceder problematic chi stess in vista, mo pustüt our dal motiv da pregüdizi nun ais il cussagl pront da far quel e decida cun vusch unanima da desister da quel.

**797 217.503.06 Sanaziun chasa da scoula**  
**Definiziun dals offerents per diversas lavuors**

Il cusglier dal dicasteri, A. Poo, preschaint'üna glista redigida da la cumischiun dal proget cullas propostas davart chenünas dittas chi dess gnir pretais offertas. Il cussagl tilla repassa e pigl'avant amo alchünas pitschnas cumplettaziuns. Ün factur chi vain eir resguardà ais dimena, la capacità d'üna ditta per effetuar las lavuors d'impressari d'ürant il temp da vacanzas da stà, dimena üna ditta plü pitschna as stuvarà cumbinar cun ün'otra.

Da remarchar ais il sequaint:

- A regard las lavuors d'indschegner ais da manzunar cha quellas s'amuntan ad üna somma marginala (ca. fr. 5'000.00). Il cussagl s'exprima cler e net da na pretender per quai ün'offerta. Il capo A. Mayer declera da vulair desister d'offerir in chosa, uschè cha quell'incumbenza vain surdatta, in absenza dal vicecapo, Andri Poo, al büro Könz, Zernez pro'l qual el ais impiegà.

Radunanza cumünala / termin

In quist connex discut'il cussagl supra la radunanza d'infuormaziun pel credit dal proget sanaziun chasa da scoula mo eir supra quella dal proget da la fusiun dals 6 cumüns a man da la cumünanza d'urna. El decida da cumbinar quai cul termin (20 favrer 2014) e da preschantar là tuottas duos ouvras manzunadas. A. Poo rend'attent, cha'l termin previs pudess ev. gnir müdà, dimena süls 27 favrer 2014. Quai decida prosmamaing la gruppa pel proget da fusiun.

**798 801 MEGLDRAMAIN DA PASCULAZIUN E FUOND**  
**Problematica proget da sauaziun / nouv filter**

La sezzüda cun tuots tangats dals 21 schner 2014 ha gnü lö. Ils cusgliers han cugnuschentscha da quel protocol. Il resultat da la tschantada ais, cha l'indschegner, Jörg Kindschi, ais gnü incumbenzà da sclerir diversas pussibilitats dals problems chi pudessan nascher, cun preventiv da cuosts. Al nomnà sto gnir infuormà in scrit, cha fin sülla fin da favrer 2014 sto quel avair evas si'incumbenza.

Quai chi bsögna però in mincha cas ais, cha'l filter existent sto gnir sanà e per part rimplazzà e cha quai fa gronda prescha, caus'il lung temp da furniziun. Per cha quel po uossa gnir postà sainza retard decid'il cussagl, cun vusch unanima, da conceder il credit bsögnaivel, da fr. 18'319.50 (offerta dals 8.11.2013 da la ditta EIG CRUSTAG amo valabla).

Remarcha:

Quista decisiun dal cussagl s'inclegia sco prefinanziaziun da la somma bsögnaivla, quai per evitar ün ev. retard resp. bloccada dal cumanzamaint da la sauaziun da prümavaira. Il scumpart da la somma vain lura tut avant cur chi'd ais cuntschaint quanta cuolpa chi crouda sün chenüna part.

**799 830** **TURISSEM**  
**Mantegnimaint sendas d'inviern**

M. Werro vaiva tut incunter intimaziuns a regard il stadi da las vias da spassegiar d'inviern (via da Chisp-Tschern e via Plattas). Nos cumün nu possed' in congual culs oters cumüns la maschin'adequata per splattütschar las sendas e perquai ais avantman la ponderaziun schi nu's vules far quai cun ün dals cumüns vaschins, p.ex. Ftan. Davart da nos manader tecnic ais gnü infuormà chi dett'üna soluziun cun nos agens indrizs e persunas da megliorar la situaziun. Cun quai va il cussagl d'accord.

**800** **DIVERSAS SCHEFS**

Plazza pel nouv pedel da la chasa da scoula

Andri Poo orientescha, cha la cumischiun incumbenzada ha invidà sün prossem mardi a duos candidats chi stan in stretta tscherna.

Uffizi forestal / eivna da scolaziun per giarsuns da Valsot e da Sent

Men Caviezel ha fat part a la visita da la conclusiun da quell'eivna. Nos silvicultur, Mario Riatsch, insembel cul silvicultur da Valsot, Cla Duri Janet, vaivan organisà ün'eivna fich interessanta ed instructiva. Id ais gnü manzunà chi dess gnir prosegui inavant cun da quellas scolaziuns chi vegnan a bön als giarsuns.

**801** **ORIENTAZIUNS**

Vendita da l'object Posta Sent / charta d'ün'abitanta

Quella vaiva suottamiss al cussagl alchünas dumondas in connex culs cumpraders, Fam. Ralf e Nicole Michel Schaad pertoccant naziunalità e ledscha da seguondas abitaziuns. Il cussagl ha tut posiziun dond las infuormaziuns adequatas.

54avel Meeting da skis Interbancario Europeo 2014 in Engiadina Bassa

Il capo vaiva fat part a la cerimonia da conclusiun da quell'occurrentza chi vaiva dürà ün'eivna. Il bilantsch chi ha pudü gnir trat dals respunsabels ais ourdvar positiv, dimena i sun gnüts registrats 1068 partecipantas e partecipants da 140 bancas in 14 pajais da l'Europa, dimena üna creaziun da valur regiunala considerabla (ca. fr. 1 miu). L'organisaziun staiva in mans da la Banca Chantunala Grischuna e dal TESSVM – Turissem Engiadina Scuol Samignun Val Müstair, ils quals meritan ün grond cumplimaint ed ingrazchamaint per lur ingaschamaint exemplaric a bön da la regiun. Ils cumüns han eir sustgnü l'occurrentza cun dedichar bels permis e.o.p.

**802** **VARIA**

I vegnan fixats alchüns termins per sezzüdas ed aboccamaints.

L'actuar:  
Marco Fallet

Il Capo:  
Albert Mayer